



Onna Maria Cavegn-Peder

14.08.1907 - 08.12.2000

La «calgera» sco'la vegneva numnada a Rueras ei naschida ils 14 d'uost 1907 a Selva. Tier sia na-schientscha ston ei haver giu prescha, quei muossa il fatg che nossa Onna Maria ha festivau varga 27 onns siu natalezi da Nossadunna d'uost, pia ils 15. Ell'ei stada il quart da siat affons, 3 buobas e 4 buobs, dil Gion Antoni Peder e dalla Maria nata Hendry da Cavorgia. Las scolas usitadas ha ella frequentau a Selva, en sut Crestas, oz san ins strusch pli s'imaginar quei sch'ins mira sin quei vitget. Beinspert ha ei giu num da segidar a casa seigi quei el puresser ni vid la posta che ses geniturs

menavan. Igl unviern veva l'Onna Maria d'ir a Rueras per la posta, e quei da tutt'aura sco ella ha meinsvart raschunau. Leu vegn'ella era da raschun ad haver fatg l'enconuschientscha cun Giachen Fidel Cavegn calger.

Il matg 1935 maridan els dus e da lur lètg sorteschan siat affons, 5 buobas e 2 buobs. Nossa defuncta era disada da pigliar en la lavur e vid lezza hai buca muncau, era buc a Rueras. Onna Maria ha cunzun sentiu quei duront il temps dall'uiara, ina truscha cun ils affons pigns, il puresser, il tenercasa - arranschar tut quei ha giu num vus, senz'agid dil consort, lez vev'il survetsch per la patria clamaud! Mo quei temps ha per cletg era pigliau ina fin, ed en dus vid il tgamun va tut pli tgunsch. Mo la buna consorta e mumma ei buca stada 1ischenta, sper la famiglia ha ella mirau vinavon dils «tiers manedels», siu ressort. Magnuc-tgaura ha la Calgera fatg dabiards e vid la mezca da casa segidava ella pruamein cun far ligiongias ed aunc bunas caussas. Ils affons ein lu vegni plaunet gronds ed ein «sgulai o» tgi pli lunsch - auters pli maneivel, ina feglia ei vinavon restada a casa culs geniturs. Dasperas, sch'il temps lubeva aunc, suenter ni avon dir rusari, ha ella priu peda per far caltschiel, forsa era per secumblidar empau. Quei hobby ha l'Onna Maria mantenui tochen en si'aulta vegliadetgna, tschiens maseinas fil....

Las dumengias suentermiezdi fageva ella e siu consort pil bia ina detga spassegiada e per ina paterlada era la Onna Maria adina promta, il Giachen Fidel vess mintgaton pigliau bugen pil cumbel e fatg vegnir ella vinavon. Il contact culs vischins e parents ha ella adina schazegiau e mantenui ed ella ha adina giu peda per ina viseta. Ell'ei stada in carstgaun da bien cor, ella scheva bia: «schiditg sco'i ha dundel jeu» ed ella ha dau bia bunas marendas. In survetsch special ha l'Onna

Maria purschiu alla baselgia, decennis ha quella saviu guder fluras e matgs ord il curtin dalla defuncta.

Il pur han ils consorts fatg tochen varga ils otgonta. Igl onn 1990 ein els sedecidi da prender pli ruasseivel ed ein serendi ella tgesa s. Vigeli a Sedrun. Varga 4 onns han els dus gudiu la Serasontga tochen che l'Onna Maria ha 1995 giu in grev accident, ch'ha ranschau ella pulit. Ell'ei vegnida ualti ruasseivla e da far ina spassegiada era buca pli pusseivel, demai che la suppia da rodas era vegnida sia cumpogna. Igl uost 1995 miera il Giachen Fidel, siu bien consort, el che veva era fatg vess che l'Onna Maria era vegnida schi ruasseivla. La calgera ei ussa persula en ina combra e pren il destin che Diu ha tarmess. Mo ella sa tuttina guder meinsvart ina viseta e sche l'aura lubescha era in techet l'aria frestga. La defuncta ha plitost pauc da raschunar, mo croda tuttina buc ell'isolaziun e gauda mintga mument da contact cul concarstgaun ed els patratgs vess ell'aunc dau dabia caffès alla viseta aschia sco ella era disada da pli baul, dar alla viseta aunc zatgei sin viadi avon che schar ir ella. Il december 2000 ei lu siu viadi terrester alla fin. Ils 8 da december, la fiasta dall'Immaculata, sesiara il cerchel da Maria che veva entschiet ils 15 d'uost 1907 e l'Onna Maria «calgera» astga turnar tiel Segner, tier il qual ell'ha urau dabia uras ed ella ha meritau il ruaus perpeten.

Daniel Desax